

L E

663.

REMERCIEMENT

des Beurrieres de Paris , au Sieur de Courbouzon Montgomery.

1977

A NIORT.

(genève)

1610.

Brunet - Tome IV. 4211

THE NEWBERRY
LIBRARY

Case

F

39

326

Volume 2

*Lestres de Creance de la communauté des
Beurrieres de la Ville, Cité, & Vni-
uersité de Paris, au Sieur de Courbou-
zon Montgommery.*

Monsieur de Courbouzon Montgom-
mery, le ressentiment que nous auons
du grand soin & vigilance, que prenez de
long temps à fournir d'enveloppe la mar-
chandise de nostre communauté, & apres a-
uoir chacune des Beurrieres rapporté en no-
stre chapitre general tenu à sainte Babylle,
iouxte le parloir aux Bourgeois, l'assistâce &
prôpt secours qu'elle a receu particuliere-
ment à la cheute des feuilles de vignes par
la copieuse & large distribution de vos li-
ures, & singulierement par la defence ma-
gnifique des Peres Iesuites, que suiuant la
trace & les memoires de la Damoiselle de
Gournay, qui a tousiours bien serui au pu-
blic, vous auez faict publier depuis huit
iours en çà. Pour n'en demeurer ingrates,
nous auôs député vers vostre tât liberale ex-
cellence, La Dame Marguerite Bas des fes-
ses, dicté la grosse Margot, assistee d'autres
notables Beurrieres, pour vous faire de no-

stre part les remercemens condignes & proportionnez à vos biens-faits, nous estans confiees à sa suffisance, à laquelle nous vous prions d'adiouster autant de foy & de creance, que si toutes en propres personnes vous estions allé faire la reuerence, Prians Dieu,

Monfieur de Courbouzon, qu'il vous donne santé de corps & d'esprit. Donné en nostre chapitre general les an & iours que dessus, & soubfcrît par nostre greffier ordinaire, & seellé d'un seau de beurre de Vanues: apres que les Capitulantes ont déclaré ne sçauoir escrire ne signer.

Harangue de la grosse Margot.

TRes-haut, tres-subtil, tres-glorieux, & enflé de belles esperances autant ou plus qu'il y ait honneur d'icy à trois pas & vn fault, Monseigneur Monsieur de Courbouzon, dit Mongommery, Dieu vous doint consolation en vos maladies, cōstance en vos afflictions domestiques, & patience en vos necessitez : car d'esperance vous en auez assez.

Comme il n'y a rien si detestable en ce monde que le vice d'ingratitude, pour lequel aucun des Anges creez en toute perfection par vne iuste vengeance diuine ont esté abîmez au fin fonds des Enfers pour y estre tourmentez eternellement : Aussi pour euitier vn tel meschef, la venerable communauté des Beurrieres de Paris, qui est la plus douce, la plus tendre, & la plus maniable compagnie de tous les corps & college de ceste grande ville, se ressentant infiniment obligée à vostre excellence par le grand nombre de vos bien-faicts, bien que ce fût possible sans y auoir pensé, & contre vostre intention, nous a député vers vous pour vous faire entendre l'alegresse incomparable, qu'elle a receu tant en general que particulier de la manne de vos beaux liures qui s'est respandue à gros flocons sur nos estaux & dedans nos eschoppes, quoy que ce soit à si vil prix, que nous les auons reputez comme dons gratuits.

Mais sur tout nous auons admiré vne singuliere

prudence, & merueilleuse prouidence fuiuis d'un courage enragé de vostre part, veu mesmement que l'on tient d'ordinaire, que iamais vn homme n'est estimé liberal en ses necessitez, & neantmoins encores que vos bouges ne soyent pas si remplies que celles d'un singe qui espluche des marrons, toutesfois vous n'avez point craint de faire imprimer vos liures à vos despens, tant pour l'affection que vous avez de vous faire recôgnoistre partizan de ces bons Peres Iesuites, dont Dieu ait l'ame le plustost que faire ce pourra, que pour tesmoigner publiquemēt, que vous ne tenez rien que le nom, de ces Capitaines Montgomeris, qui ont vendu autrefois l'orge si cherement, & se sont plus amusez à battre les bons Catholiques, qu'à faire des liures, comme vous monsieur Courbouzon, ioinct le desir treil-loüable que vous auiez de vous faire crier deuant le Palais, & vous faire veoir tout de vostre long dans les spacieuses boutiques pendues au col, bien sanglees des Colporteurs.

Ce ne sont pas là, Dieu mercy, les premiers de vos liures qui ont passé par nos mains. Et moy qui parle, ie puis dire veritablement & sans iactance, en auoir vſé plus de deux rames, en moins de quinze iours, la grace à vous : car aussi tost qu'un Charantoniste, ou quelque Polirique fauteur & adherant, a faict quelque liure, tant gros puisse-t'il estre, vous le deuorez en vingt-quatre heures, & faictes comme Iulian l'Apostat, lequel apres auoir leu aucuns des liures des deux Apolinaires Pere & Fils, de S. Basile, de Nazianzene, s'en rit, & dict aux principaux Euesques de son temps, i'ay veu, i'ay

congnu, i'ay condamné Ainsi faites vous Monsieur de Courbouzon : Car vostre esprit est si vif, que sur le nom seul du liure, & à trauers la couuerture, vous iugez de la bonté d'iceluy, & y respōdez comme il faut, & fort à propos pour nostre Communauté.

Ie laisse volontiers à part, ce que non moins librement que sagement, vn Chrestien (fut S. Basile, ou autre) respondit à cest Empeur, Tu as leu, mais non entendu, car si tu l'eusses entendu, tu ne l'eusse improué ou condamné, d'autant que ceste réponse n'est pas maintenant de saison, & ne sert de rien à vostre louāge. Voila donc en quoy reluit la grande viuacité de vostre esprit, qui se fera tousiours admirer par voz liures tant & si longuement que l'on mangera du beurre à Paris.

Nous auons d'ailleurs à louer vostre prudence, en ce que fort industrieusement, si mieux vous n'aimez que nous imputiēs cela à vostre naturel, vous escriuez en stile si rude & raboteux que tel qui s'en est voulu seruir de mouchoir au pays bas s'en est trouué tout escorché par l'huis de derriere, si bien que pour adoucir le tout, necessairement il a fallu auoir recours à nous autres Beurrieres. Et c'est là, de par Dieu, où malgré nous, nous puisons les eaux viues de la sainte Philosophie, par ce que iusques à ce que le beurre soit vendu, nous auons tousiours l'obiet de vos beaux liures deuant nos yeux, d'où vient que deuenuēs sçauantes insensiblement, vous entendez passant par les halles, & autres places publiques, tant de beaux Apophregmes, de sentences, & mots dorez que nous auons

appris par la lecture de voz rares escrits.

Il est bien vray que depuis nagueres ils se sont presentez quelques mal habiles gens qui ont voulu entreprendre sur vos marches, & vous desrober vostre chalandize, comme vn certain Peletier, & la Damoiselle de Gournay, pucelle de cinquante cinq ans, qui s'y sont meslez de publier des defèces pour les Iesuites, comme ayans interest en la cause sous preteste qu'ils ont esté r'appellez & re-stablis à la poursuite, brigue, & sollicitude du postillon general de Venus.

Mais prenez courage, Monsieur de Courbouzõ, ces bons peres ont bien d'autres deffenseurs, & de plus grands Seigneurs, que toute ceste racaille. Ne laissez pas de faire tousiours imprimer vos liures. Au pis aller ce n'est que du temps, de l'encre, & du papier perdu, mais pour le moins vous ferez parler de vous, pour vn temps: en bien ou en mal, c'est tout vn. S'en scandalize qui voudra, pourueu que les Beurrières y profitent, aussi bien dit-on que vous ressemblez aux brebis qui sont nourries d'absynthe près la mer majour, & que vous n'avez point d'amer.

Sur tout ne prenez pas garde à tout ce que pourroyent faire ny dire vos aduersaires, qui par certaines remarques qu'ils disent auoir fait de vos ignorances & calomnies, voudroyent bien vous fermer la bouche, & emousser vostre plume si trenchante, afin de vous oster le goust, & le prairit de plus faire tant de beaux & gros liures qui ont chacun vne feuille pour le moins, & nous priuer par ce moyen des fruits de vos liberalitez.

Sivous ou vostre imprimeur y perdez à la vente, il n'importe, tant mieux pour nous. On dict communémēt que l'un n'y perd que l'autre n'y gagne. Croyez que nous aymons mieux millé fois ouyr parler que vous faciez imprimer des liures qu'un tas d'Anticotons que chacun pour le temps qui court veut auoir en son estude ou en sa pochette comme un guide de la verité, à ce que plusieurs, qui croient que les bons Peres Iesuites sont Auteurs, par leur mauuaise doctrine, de la mort de nostre pauvre Roy deffunct, que Dieu absolue, ont publié par tout. De dix impressions de semblables liures, il ne nous en tomberoit pas un entre les mains, aussi n'aurions nous garde de les acheter, par ce que l'argent y croist de moment en moment chez les Imprimeurs. Au commencémēt on les védoit cinq sols, puis dix, puis seize, puis un demy escu. Et apres que l'Imprimeur pour satisfaire à la passion du Pere Coton a esté saisi par aucuns particuliers zelez, & emprisonné d'autorité privée, on n'en trouue point à moins d'une pistole, il nous faudroit bien rehausser le prix du beurre, si nous en prenions à ce taux. Ce n'est pas viande pour nos oiseaux. Mais vos liures, Monsieur de Courbouzon, c'est iustement nostre portee, ils s'y debitent au rabais, comme le charbon de Grene, tant il y a bonne ville en ceste police.

C'est aussi en quoy les gens de bien qui ne desireront pas l'encherissement des denrees, vous estiment infiniment, & trouuent parce que vos liures sont tousiours entre les mains des beurrieres, qu'en conscience ils sont bien meilleurs que ces pail-

lards d'Anticorons, & autres semblables, car il est
 escrit au liure de Iob cha. 20. Que les meschans ne
 verront point les ruisseaux des fleuves de miel &
 de beurre, *Ergo*, par vn argument à sens contraire,
 ceux qui sont tousiours parmy le beurre, voire qui
 seruent à l'envelopper comme vos liures, sont bñs:
 & ne croy pas que tous ces Anticotonistes puissent
 apporter vne solution vallable à cest argument.
 Quant à moy apres l'auoir exactement leu, i'en ay
 dit librement mon aduis, que i'y auois pris vn fort
 grand plaisir, & m'en sentoie fort edifiee, voyant
 que vous estes si resolu, & parlez comme ayant
 autorité: & d'ailleurs i'ay creu certainement que
 vostre fleau seruiroit à chasser tous ces gros chiens
 Aristogitons, & porteurs de beurre au marché,
 bien loin de nous & de nos denrées. De sorte que
 l'ayant presque tout mis en ma memoire pour sa
 briefueté, ie courus aussi tost aux fauxbourgs de
 S. Germain des prez chez Mademoiselle de Fran-
 ce qui est de la Religion pretendue reformée, la
 maison de laquelle i'ay cest honneur de fournir de
 beurre depuis la reduction de Paris, croyant qu'aussi
 tost que ie luy aurois fait voir vostre liure, ce se-
 roit aussi tost vne ame gagnée. Mais helas, i'y ay
 bien trouué change de monnoye. Car de mauuai-
 se rencontre Monsieur son mary estant suruenü &
 ietté l'œil sur vostre liure que nous lisons, puis
 que nous sommes icy à part, & que vostre visage
 me fait croire, que mes propos ne vous sont point
 autrement des-agreables, ie prendray la hardiesse
 de vous raconter priuément, ce que ce bon Sei-
 gneur, partie en riant, parue à bon esciēt nous en a

dict, & le iugement qu'il a fait de vostre liure, mesmes parce que ie n'entends le Latin non plus que le haut Allemand, comme vous pouuez croire, voilà vn papier qu'il m'a baillé pour monstrier à ceux qui vo us flattans par trop, voudroient faire croire aux plus fols que vous auez fait des merueilles.

Premierement doncques il courut tout vostre liure en vn moment, & me souuient qu'en lisant chacune page il se souzrioit, quelquefois il s'eclatoit, autre fois en marquant quelque ligne de son ongle, il luy eschappoit de dire. O le grand veau! dequoy par menenda, ie me sentoie toute scandalizee: tellement qu'apres auoir reiecté vostre liure sur la table, ie ne peuz me tenir de luy dire, & bien, Monsieur, que vous en semble? Comment? ma commere, respondit-il, ie voudrois que le sieur de Courbouzon, puis qu'il se dict estre de la maison de ces braues Montgommeris qui ont acquis tant d'honneur par leur valeur & sages deportemens, iusques à auoir seellé de leur sang la verité de laquelle ils faisoient profession, eust la ceruelle mieux timbree, & ne seruit point de marotte aux Peres Iesuites? Ce pauvre homme me fait pitié. Helas, ne scait-il pas bien que le Pere Coton s'est ait veu frotté & estrillé en compere & en amy par l'Anticoton, & ne sachant dequoy y respondre, apres auoir esté mendier des memoires de toutes parts, qui tous ne valoient rien, & par la confrontation se trouuoient faux, afin qu'il ne semblast point par vn silence vniuersel aduouer, ce qui luy a esté obiecté, s'est premierement adres-

se à vne Damoiselle Carabine qui pour la defense de ce venerable, a eu bien tost vse la pouldre de son fourniment, & puis ayant enseigné au sieur de Courbouzon, le marchand chez lequel on prend ceste munition, luy ont fait iouer l'enfant perdu, le Pere Coton se tenant tousiours au gros de la bataille qui regarde faire les autres, en attendant l'heure de donner ou de s'enfuir.

Or courons cest Almanach. Je passe l'epistre à la royne, de laquelle ie ne puis parler qu'avec vn singulier respect de sa Majesté, & suis autant marry que son nom sacro-sainct soit meslé parmy les asneries de ce siecle, que scandalizé de ce que ce miserable Scribe dict, que tout ainsi que ceux de la maison des montgommeris ont rendu fidelles seruices au deffunct grand Monarque Henry, ainsi il est obligé à deffendre ses bons seruiteurs les Iesuites, faisant sottement & criminellement vn parallele du seruice du Roy & de la defense des Iesuites les plus grands ennemis qu'il eut iamais, quoy que couuerts en France, & declarez par tout ailleurs.

Le titre de ce grand œuvre, est le fleau d'Aristogiton. A la verité iettant l'œil premierement sur ce mot de fleau, ie pensois qu'il nous fut suruenue apres Aoust quelque chartier ou batteur en grange, mais le mot d'Aristogiton qui suit, me fait croire que l'Auteur veut contrefaire le sçauant, ou bien que par ce grād mot il a pensé faire peur aux petits enfans, comme celuy qui croyoit que Macrobe estoit le nom du Diable, ou bien que par vn mesme ton il a voulu rithmer Aristogiton sur Anticoton, autant ques'il eust dict marmiton, ou porteur

derogaton, tout ainsi que si au lieu de responce au liure du sieur de Courbouzon, on disoit le fleau de corps d'oison. Quoy qu'il en soit, ie ne puis deuiner à quel propos il a surnommé l'Anticoton Aristogiton, & pensois que par la lecture du discours i'apprendrois quelque similitude de vie & façon de faire en l'un & en l'autre, mesmes que cela me feroit decouurir qui est l'Auteur de cest Anticoton, mais c'est grand pitie que hors le titre il n'est parlé vn seul mot en tout le discours d'Aristogiton, sinon à la premiere page, où il dict, qu'au lieu d'intituler le traicté l'Anticoton, il deuoit plustost dire l'Aristogiton. Nous voila aussi scauans qu' auparauant. Car au fonds il y auroit bien plus d'apparence d'approprier le nom d'Aristogiton aux Iesuites, qu'à l'Anticoton, lequel par ce discours n'est accusé d'aucun de ces vices infames qui estoient familiers à Aristogiton.

L'histoire Grecque nous apprend qu'Aristogiton estoit vn Sodomite qui auoit harmonius pour son bardache. Ce vice est ordinaire entre les Iesuites, tesmoin la deposition de Chastel leur eschohier, surquoy ceux qui ont deuiné par la rencontre des Anagrammes, sur *Iesuitarum secta*, ont trouué par l'inuersion des lettres, *Et tu mares vicias*, encores que ie ne m'arreste pas à cela, parce que comme aux cloches on fait dire aux lettres tout ce que l'on veut.

Aristogiton tua au iour de la grand' feste Panathenee Hipparchus frere du Roy Hippias, & fils du Roy Pisistratus: L'Anticoton a monstré que les Iesuites par leur doctrine abominable ont faict

ruer Henry le Grand au milieu de ses triomphes. Si le pauvre Courbouzon y entend plus de finelle, nous attendrons qu'il gloze son discours pour la foire prochaine. Venons au texte & nous depeſchons.

Fol. 3. pag. 1. & tout au commencement, il dict qu'il croit les Iesuites fort vtile en Frâce pour la mañutention de la religion, à cause de l'animosité que les Huguenots leur portent. Voila certes vne fort belle illation, & vn sophisme aussi aigu que les fesses d'un moyne. Si ce que les Huguenots ont en horreur est vtile pour maintenir la religion en France, les Huguenots haïssent les coupeurs de bourses, les paillards, les sodomites, les tueurs & massacreurs des Roys, *Ergo*, par vostre Dialectique monsieur de Courbouzon tous ces gens de bien là sont tres-vtiles pour maintenir la religion en France. Vous estes en bonne foy vn grand Philosophe, & auez la ceruelle bien quintessentiee. La cause de la haine que les Huguenots portent aux Iesuites n'est pas la diuersité de la religion, puis qu'il plaist au Roy de faire viure ses subiets en paix, souz le benefice de ses edicts, autrement ils auroient bien plus d'occasion de hayr messieurs de la Sorbonne & tant d'autres ſçauans hommes & excellens Theologiens Catholiques, desquels les Iesuites ne font qu'escumer les escrits dont ils composent leurs rapsodies, & en font leurs plus grands festins. Mais la cause de la haine des Iesuites est commune à tous les bons François de l'une & l'autre religion. Leur hypocrisie, leur trahison, leur meschante & pernicieuse doctrine qui enſei-

gne à tuer les Oinets de Dieu, leur cabale avec les estrangers, leurs intelligences avec les ennemis de la France les fait hayr par tous les gens de bien.

Pag. 2. Courbouzon parle des Ministres encheuestrez d'un froc. Voila bien rencontré, comme si les Ministres le couuroient de cest abrifou, ou s'ils estoient accoustumez de porter ceste escharpe, comme les moynes ausquels ceste parure sert de recognoissance. Mais il a pensé auoir dit quelque chose pour faire rire; aussi nous a ton dict que par la faueur du Pere Coton, il brigue en court pour auoir vn estat de Ioyeux du Roy. Et de faict en la mesme page il continue à faire le boufon, quand il crie, c'est Lycaon, voila le galant. Je luy demanderois volontiers où il pense estre, quand il fait ces belles exclamations, s'il cuide iouer vne farce aux pois pillez, enfariné & encheuestré du beguin de Jean poignan, ou bien s'il est si sot d'auoir oublié qu'il parle à la Roynie avec si peu de reuerence & des mots de gueuzerie du port au foin, comme au feuillet 9. pag. 1. quand il dict que ce sont contes propres à reciter en tauerne entre la poire & le fromage. Iamais ceux qui sont du vray tige de Montgommery ne furent si mal appris de parler aux Roys & aux Roynes de ceste façon. C'est pourquoy il y a danger qu'il n'y ait quelque *deficit* en l'inuentaire.

Suyuons, & qu'il nous die vn peu si c'est du François ou bas Breton (Ne voyez vous pas son long museau, & sa dent enuenimée au sang de tout l'Englise.) Que veut dire ce langage? N'a-il point d'au-

tre Rhetorique pour renuerfer l'Anticoton ? Je m'asseure que la presumption qu'il a eu d'auoir si bien fait luy a fait mettre son liure en lumiere sans l'auoir fait reuoir au Pere Coton. Car il n'eust pas failly de luy fournir quelques mots non vulgaires, tirez de la Sphere, comme de Poles, de Tropiques, d'Ange, d'Ascendans, de Zeuith, & autres semblables dont il beffle & se fait admirer par ces pauvres courtisans, pour entrelarder ce maigre discours, & luy donner quelque pointe.

Mais possible que le bon pere Mitis estoit assez empesché d'ailleurs à reformer les passages des auteurs qu'il a si mal traduits en François dans son institution Catholique, qu'il fait dire aux bonnes gens tout le contraire de ce qu'ils ont escrit en Grec ou en Latin, ou bien à appaiser le pauvre Chappeller son Imprimeur qui se plaint tout hautement de n'en auoir pas tant vendu qu'il en a donné. Tellement, ma commere mamie, qu'il y a apparence que bien tost ceste belle institution ira veoir les Beurrieres pour faire compagnie aux oeures si elegantes du sieur de Courbouzon.

Fol. 4. pa. 1. & suiuanes, Surce quel' Anticotō a dict que c'est l'opinion commune parmy tous les François & estrangers, que c'est la creance des Parlemens, de la plus part du Clergé, & de la sacrée faculté de Theologie que les Iesuites sont coupables de la mort du feu Roy, par leur maudite & pernieuse doctrine : Courbouzon se contente simplement de dire, que cela est appertement faux. O impudence effrontée ! He, qui est le bon François auourd'huy, iusques aux pauvres Herbières
des

des halles qui voyant passer vn Iesuite par la ruë, ne iecte aussi tost vn soupir, & ne dit avec vn extreme regret: Voila de ces meschans qui ont fait tuer nostre bon Roy. Quant aux estrangers, ils en parlent à cœur ouuert plus que nous mesmes, & se moquent de nostre patience, & de nostre si grand endormissement, de souffrir encores ces viperes parmy nous.

Pour le regard des Parlemēs, les Arrests ne sont ils pas assés publics, contre Barriere, incité & cōfessé par Varade Iesuite, cōtre Chastel escolier des Iesuites, contre Guignart son precepteur, contre Hayus Escossois, contre Mariana? Ce monument superbe esleué deuant la grād porte du Palais, de l'autorité de la Cour, en l'honneur de nostre grand Roy, en actiō de graces à Dieu, d'auoir preserué la vie des attentats des Iesuites, en horreur & detestation des massacreurs des Rois, n'est-ce pas vn suffisant tesmoignage de la creance du Parlement?

Nous pensios à la verité, que les Iesuites ayans par leur Escolier frappé le Roy en la bouche, en intention de le tuer, & depuis abusans de la clemence infinie de ce bon Prince, fait abatre la Pyramide, marque de leur trahison, perfidie, & cruauté, sans autorité de iustice, & au mesme temps qu'ils publierent l'Apologie de Garnet Iesuite, autheur de la fougade d'Angleterre, fait cēsurer en l'Inquisitiō de Rome l'Arrest de la Cour de Parlemēt, portāt leur cōdamnation avec celle de Chastel, leur rage demeureroit assouuie, & que du moins ils feroient comme les Lyōnes qui ne

conçoient & n'engendrent qu'une seule fois & avec leur premier fruit, iettēt leur matrice. Mais tout au contraire nous auōs expérimenté à nostre tres-grād malheur, qu'ils sōt du naturel des Lieures, lesquels apres avoir mis hors leurs petits, à l'heure mesme en conçoient vne douzaine d'autres. Ie sutes pires que les Loups des Palus meotides quis'appriuoisent, & gardent les filets des Pêcheurs qui leur donnent quelquefois à manger.

Quāt au Clergé & la Faculté de Theologie, les sermōs publics de tant de braues Docteurs: le decret de la Sorbonne sur lequel le liure de Mariana Iesuite bruslé, & en iceluy la doctrine vniforme des Iesuites qui apprend à tuer les Roys, a esté bruslée par les mains du Bourreau, deuant le grand portail de l'Eglise de nostre Dame de paris, démentent le démenty de Courbouzon, qui contrefait par trop l'ignorant en l'histoire si recēte de nos malheurs.

Et quoy? ces Peres venerables sçauroient ils denier que tout fraichement pēdant le siege de Iuliers, vn Iesuite a presché publiquement, à Coloi-gne que Rauaillac estoit vn saint Martyr, pour encourager les esprits assassins à faire le sēblable enuers les Princes Chrestiens, & pour excuser deux autres qui trois iours auparauant auoient esté pris à Murs, ayans vn dessein sur la vie du Comte Maurice. Dequoy quelques Seigneurs & capitaines vrayemēt François, ayans fait instance, & iceluy demandé pour en faire faire iustice, se doutās qu'il sçauoit quelque chose de la conspiratiō de Rauaillac: Les Peres y mirent bon ordre &

promptement: car recognoissans que sion pressoir, mal-aisément pourroit on refuser de le liurer aux François. Ils l'empoisonnerent, par vn mesme artifice qu'ils ont fait Hayus leur confrere, lequel ayant esté banny par Arrest du dixiesme Ianvier, 1595. pour auoir enseigné publiquement qu'il faloit dissimuler & obeir au Roy pour vn temps par feintize, disant fort souuent ces mots, *Iesuita est omnis homo*: Et dauantage, qu'il desireroit si le Roy passoit deuant leur College, tomber de la fenestre sur luy pour luy rompre le col: Et ayant depuis repeté & confirmé ces mesmes paroles en la ville de Prague, sur ce que les plus grands de ce Royaume sollicitèrent de le faire amener en France, on respondit qu'il auoit auallé vn orge mondé qui n'estoit pas bien cuit; & se trouua mort aussi soudain que le Frenost des Mareschaux de Pluiers (lequel a deux enfans avec les Iesuites) estranglé au Chastelet d'vn lacet de son caleçon, qui n'estoit assez fort pour brider vne mouche. Mais voicy la ruze des compagnons: d'autant qu'ils recognoissent en nostre ieune Roy vne vigueur d'esprit, qui promet avec le temps de faire vne iustice exemplaire de ceux qui seront trouuez coupables du tres-cruel assassinat, commis en la personne du feu Roy son Pere, ils luy ont de longue main, & fauslement persuadé que ce prescheur de Coloigne estoit Cordelier: Mais la verité paroistra tousiours, fut elle enueloppée de cent milliures de Coton.

Or ce braue defenseur des Iesuites, pour les tirer hors du pair, argumente ainsi, Les Iesuites sont du corps de l'Eglise: l'Eglise defend de tuer les Rois,

Ergò, les Iesuites n'enseignent pas de tuer les Rois. Tournez la medaille, & argumentez ainsi. L'Eglise defend de tuer les Rois, Les Iesuites enseignent à tuer les Rois, *Ergò*, les Iesuites ne sont pas du corps de l'Eglise. Passons outre, & voyons vn autre raison encore plus falotte.

Les Iesuites, dit-il, n'ont peu instruire Rauaillac à tuer le Roy, par ce que leurs liures sont en Latin, & encor assez obscur, que Rauaillac n'entendoit pas; comme si les Iesuites en leurs conferences secretes, & en la confession faicte au Pere Daubigny n'auoient iamais parlé qu'en Latin obscur. Il ne faut point apprendre à ces bonnes gens la maniere de corrompre les foibles esprits. Ils n'ont que faire pour cela d'aller au conseil de Courbouzon; en fin il dict que les Docteurs Lutheriens & Huguenots en ont plus dict & escrit que ne fit iamais Mariana. Cela n'est pas soudre l'obiection que faict l'Anticoton, ains faut confesser ou nier si les passages des Iesuites alleguez par l'Anticoton sont vrais ou faux. Car s'ils sont vrais, la cause est gaignee. S'ils sont faux, c'est au sieur Courbouzō defenseur des Iesuites de monstrier où est la faulseté, & puis on sçaura s'il dict vray du reste. Mais là dessus il est demeuré bien court, aussi est-il malaisé de combattre la verité, encore plus de l'abbatre.

Or ce qu'il dict & allegue de Calvin & de Luther, le bon Seigneur n'a pas mis le nez si auant dās leurs liures, ce sont les memoires que le Pere Coto vouloit inserer premierement en sa lettre declaratoire, mais l'ayant communiqué à vn des messieurs les gēs du Roy auparauant que de la faire imprimer, il luy

conseilla sagement de retrācher ces allegations de sa lettre, pour beaucoup de raisons, & pour sauuer l'honneur du pauvre here. Depuis neantmoins il les donna à la pucelle de Gournay, & de là par vne traditiue sont venus iusques au sieur de Courbouzon. Encōres nous a tō dict qu'il y a ie ne scay quel reliqua duquel il a armé vn certain gros matou portant au visage le caractere Pedantesque indubitable, qui doit entrer vn de ces iours en lice pour la defense des Iesuites. Mais on en sera quite pour dire quand on le verra garde la corne.

Aussi est-ce la verité que l'on ne trouuera iamais en toutes les œuures de Caluin ny de Luther vn seul endroit où ils diēt qu'il soit loisible de tuer les Roys. Qui voudra sçauoir au vray quelle a esté leur doctrine, elle ne se peut mieux apprendre que par les liures qu'ils ont fait de l'institution de la Religion Chrestienne: c'est là où on cognoistra ce qu'ils ont eu dans l'ame. Voyez ce que dict Caluin en son Institution, liur. 4. chap. 20. sect. 25. & iusqu'à la fin. Qu'en vn homme peruers & indigne de tout honneur, lequel obtient la superiorité publique, reside neantmoins la mesme dignité & puissance laquelle nostre Seigneur, par sa parolle, a donné aux Ministres de sa iustice: & que les suiets, quant à ce qui appartient à l'obeissance deuë à sa superiorité, luy doinent porter aussi grande reuerence qu'ils feroient à vn bon Roy, s'ils en auoyent vn. On cognoist assez quel Roy a esté Nabucodonozor celuy qui print Ierusalem; c'est à sçauoir, vn grand larron & pilleur: toutesfois nostre Seigneur afferme, par le Prophete Ezechiel, qui luy a don-

né la terre d'Égypte pour le loyer de son œuvre
 dont il luy auoit leruy en la dissipant & saccageant.
 Quand nous oyons qu'il a esté constitué Roy de
 Dieu, pareillement il nous faut reduire en memoire
 l'ordonnance celeste qui nous commande de
 craindre & honorer le Roy, & nous ne doubterons
 point de porter à vn meschant tyran tel honneur
 duquel nostre Seigneur l'aura daigné orner. Et en
 la sect. 27. Si ceste sentence nous est vne fois bien
 resoluë & fichée en nos cœurs, c'est à sçauoir que
 par icelle mesme ordonnance de Dieu, par laquelle
 l'authorité de tous Roys est establie, aussi les
 Roys iniques viennent à occuper la puissance: la-
 mais ces folles & seditieuses cogitations ne nous
 viendront en l'esprit, qu'un Roy doine estre traicté
 selon qu'il merite, & qu'il n'est pas raisonnable
 que nous nous tenions pour subiects de celuy qui
 ne se maintient point de la part enuers nous com-
 me Roy. Et en la Sect. 9. Nous deuons tous à nos
 superieurs, tant qu'ils dominant sur nous, vne telle
 affection de reuerence que celle que nous voyons
 en Dauid (enuers Saül) mesmes quels qu'ils soient.
 Ce que ie repete par plusieurs fois, à fin que nous
 apprenions de ne point esplucher quelles sont les
 personnes auxquelles nous auons à obeir: mais que
 nous nous contentions de cognoistre que par la
 volonté du Seigneur ils sont constituez en vn e-
 stat, auquel il a donné vne Majesté inuiolable. Voi-
 la en sommaire quelle a esté la doctrine de Caluin,
 expliquée plus au long en dix ou douze colonnes
 de son Institution. Tous les Docteurs Theologiens
 comme P. Martyr, Musculus, & autres de mesme

profession en ont escrit de ceste mesme sorte, & c'est la constante doctrine qu'ils ont tous annoncée en leurs Eglises. Que si pendant que les feux estoient allumez par toute la France, & au plus fort des persecutions, il est eschappé à Calvin, en ses predications, quelque parole d'aigreur contre ceux qui affligeoyent ainsi l'Eglise de Dieu, où avec moins de respect, que possible il eust esté à desirer pour le monde. Il faut donner quelque chose à la qualité d'homme, subiect aux passions comme les autres, mesmement en la defense d'une cause que l'on croit estre iuste, le temps le rend excusable, auquel pour la conservation de son troupeau, il ne pouvoit autre chose opposer que des paroles à tant de sinistres effects, desquels ceux qui les ont commis se sôt depuis repentis. Et encores ce n'est point luy qui les a publiez. Que l'on regarde tous ses liures delquels on a voulu extraire quelques rudes paroles contre les Tyrans: Il se trouuera que ce sont des auditeurs qui les ont recueillis de sa bouche, & d'eux-mesmes les ont fait imprimer sans son adieu, & sans les luy auoir faire renouir auparavant. Mais quoy que ce soit, que l'on espluche tant exactement qu'on voudra toutes ses œuvres, il ne se trouuera iamaïs vn seul mot de tuer les Roys, non pas seulement de se rendre reſactaires à leurs comandemens en aucune façon, sinon en cas qu'ils vouluſſent empescher leurs subiects de seruir Dieu, & qu'ils vouluſſent establir leur thrône par dessus celui de Dieu. Auquel cas les subiects ne sont pas tenuz de leur obeyr, comme l'atres-bien explique Calvin sur Daniel, dōt le sieur

de Courbouzon n'en a rapporté qu'une partie escourtée, mais en tout cas, & pour quelque occasion que ce soit, il se tiennent tousiours à la saine doctrine, Qu'il n'est point permis d'attenter à la sacrée personne des Roys.

Le mesme a escrit Luther, en tous ses liures spécialement parlant du Pape en son commentaire sur l'Epistre de S. Pierre chap. 2. en cest endroit sur ces mots: *Time Deum, honorate Regem*, où il dict: *Non iubet ut magni Reges ac rerum dominos faciamus, sed ut nihilominus, honoremus, etiam si Ethnici sint. Id quod fecit cum Christus ipse, tum Prophetæ qui se ad pedes Regum Babylonis prostrarunt. Possis autem hic dicere: Ergo vides, vel ex hoc loco, obediendum Papæ, & quemque decere ut ad illius se pedes prosternat? Respondeo. Verum id quidem est, si profanam illam sibi potestatem usurpet, & externum agat Principem, profecto illi obediendum est: ut si ita dicat, Præcipio tibi ut cucullam gèstes, aut sis raso vertice, vel, isto die ieiunes, non quod credas huius rationem, haberi apud Deum aut esse id ad salutem necessarium, sed tantum ideo, quod ita mihi, tãquam profano principi tuo visum sit. At vero cum ad hunc modum tyrannissat: Præcipio hoc tibi, loco dei omnipotentis, ut ipsum, haud aliter quam ab ipso Deo mandatum amplectaris, atque observes sub pœna excommunicationis ac peccati mortalis; tũ dicas, Bona verba, Sitis mihi propitijs domine Papa. Equidã quod mādatis nullus fecero. Et d'autant ma commere ma mie, que vous n'entendez pas le Latin, ie le vous dõne par escrit en ce papier pour le communiquer au sieur de Courbouzon, où telle autre personne qu'il vous plaira, pour sçavoir lequel de nous est menteur*

teur. Car ie suis asseuré que ceux qui voudront prendre la peine de s'esclaircir de la verité, trouveront que le nom d'Aristogiton, ie ne dis pas ce tueür de Roys, ou de Prince du sang Royal, mais de celuy qui pour ses impudentes calomnies, fut appellé Chien, & qui par Lycurgus & Demosthe-ne fut estrillé en chien courtault, appartient iustement au sieur de Courbouzon, qui abbaye contre ceux lesquels ont en leur vie, & par tous leurs escrits, tousiours abhorré, & detesté les parricides, & massacreurs de Roys.

Quand à ce qui est rapporté de Buchanan, c'est l'opinion d'un homme particulier qui n'eust oncques le caractere de Docteur, ny de Pasteur en aucune Eglise, Il a escrit ses passions historiquement qui n'obligent personne à le croire. Et puis, le temps auquel il a escrit, le soing du Maistre qu'il seruoit, & l'estat des affaires d'Escoffe qui estoit lors, l'ont pousé à escrire beaucoup de choses que possible depuis il n'eust pas voulu soutenir.

Tout le reste de ce miserable discours ne merite pas qu'on s'y arreste dauantage, par ce quel'Anticoton ayant touché au vif, & déclaré par le menu les sottises, meschancetez, & impietez de ces bons Peres, Courbouzon se contente de dire que ce sont fables, & qu'il n'en est rien, mais ie croy qu'il attend vn plus iuste volume de Responces, que l'on dit le Pere Coton auoir obtenu permission de faire imprimer, toutesfois il y a grande apparence qu'il ne le fera pas qu'apres la Sainct Martin, d'autant que ce sont les memoires qu'il doit donner à son Aduocat pour plaider la cause de la Societé

contre l'Vniuersité de Paris.

Ioint qu'il faut encore du temps au pere Coton, pour mendier les desadueuz par escrit de ceux qui encores qu'ils sçachét la verité de la cabale des Iesuites, toute fois ne veulent point de querelle particuliere.

On sçait comment monsieur de Suilly pour l'affection qu'il porte à cest Estat a gouuerné cy deuant le pere Coton & en la presence du feu Roy luy a reproché sa trahison & lascheté d'auoir esté si meschant d'escrire en Espagne ce que le pauvre Prince luy auoit reuelé en confession, & luy a representé les originaux de les lettres interceptes sur le doubte que l'on auoit que le secret du Roy se descouuroit aux estrangers. Mais en ce temps là ce bon Seigneur auoit vn maistre qui mettoit la main à l'Espée pour le deffendre: & tel crie hautement aujourd'huy, qu'il y a cinquante mil hommes en France pour maintenir les Iesuites, lequel n'eust osé ouurer la bouche pour tant soit peu les recommander, & lors faisoit bien le chien couchant.

Quant à l'Abbé du Bois, il a presché publiquement la Legende des Iesuites, & ses Sermons ouys & receus avec autant plus d'applaudissement, que chacun en sa conscience sçauoit qu'il preschoit la verité, & pour ce regard il est trop tard de s'en desdire. Mais quant à la religieuse d'Auignon, à laquelle le Pere Coton a fait vn petit Iesuistillon, On sçait bien qu'il y a eu ce pretendu desadueu de la sainte operation de Monsieur le Nonce, lequel a promis à ce pauvre du Bois, de luy faire donner vne bonne pension, ie ne diray point par

qui, moyennant qu'il declarast par escrit au Pere Coton qu'il n'en auoit iamais parlé. *Et sic necessitas cogit ad turpia.*

Et neantmoins il n'y a pas en cela dequoy plus s'estonner, que quand le Pere Maiorus en l'an 1576. fit vn enfant à la Mcusniere d'Azenay, proche de la ville de Bourges, lors que ces bonnes gens commençoient à s'establir en icelle, pour faire paroistre en effet que, *Iesuita est omnis homo.* Cela n'est pas vn si grãd miracle, que ce qu'ils ont fait eux-mesmes imprimer à Douay d'une pauvre fille flamende qui n'aucit pissé il y auoit douze ans, mais aussi tost que les Peres Iesuites luy eurent appliqué sur le nombril les Reliques du Benoist pere Ignace en forme de cataplasme, aussi tost tous les cõduits naturels de ceste pauvre fille furent ouuerts cõme les cataractes du Nil, & pissã plus copieusement que six vaches. Il est vray que les copies de ce miracle pisseux, ayans esté apportées en ceste ville & reimprimé en faueur de la Canonizatiõ future de ce Reuerẽd Loyola, ceux qui ont bon nez, comme il y en a grand nombre en ce quartier, ne peuuent supporter vn odeur iĩ infecte, & commencerent à s'en mocquer à bon escient, de sorte que pour euitier à plus grande rumeur, on fit emprisonner pour la forme, quelques pauvres Colporteurs qui les vendoient, encores qu'ils en eussent représenté plus de cent exemplaires imprimez à Douay & à Bruxelles.

Or, monsieur de Courbouzon, apres auoir entendu tous ces propos, si iamais femme demeura

estonnee, ç'a esté la pauvre suppliante. Car sur la veüe de vostre liure, & au bruit de vos belles raisons, ie m'estois persuadée qu'aussi tost le temple de Charanton tomberoit à bas, comme les murs de Ierichodeuant l'Arche: mais apres auoir repris mes esprits, ie songeay que si cela estoit vray, nostre communauté n'eust pas receu vn si grãd raiuaillement de voz liures, ny moy honoree d'vn si precieux Ambassade vers vostre excellence qui n'est à autre fin sinõ apres vn milliers de remerciemens de la part des venerables Beurrieres de la ville, Cité, & Vniuersité de Paris, & infinies actiõs de graces, pource qui est du passé vous supplier tres-humblemēt de continuer vos beaux escrits, afin que quand à l'aduenir nous entendrõs crier deuant le Palais. Voila le liure du sieur de Courbouzon Mōtgomery, nous puissions hardimēt & en toute asseurance dire febé, pour qui est ce? c'est pour nous. I'ay dict,

Au surplus il ne se faut estonner si en s'adressant à la personne de Pierre Coron, l'Auteur del'Anticoton a si bien estrillé toute la secte. Car ayant esté choisi d'vne humeur plus courtoisane, afin que sous le beau semblant de sa sainte mine, il peut esleuer les desseins du Roy, & en aduertir les Freres qui disposent ordinairement leurs Sermons, selon les nouuelles occurrences du vent de Cour, telmoins ceux que fit le Pere Gontier à Noel dernier, qu'est-ce autre chose sinon des commentaires & explications des instructiõs particulieres du Pere Coton?

Coton que l'on cognoist & remarque estre vti-

le & prouuer les affaires du Roy d'Espagne & autres qui desirerent l'agrandissement de leur estat par la diminution d'un autre. Coton semblable à ce Couthon ou goubelet Laconique, dont parlent Athénée en l'unzième de ses Deipnosophistes, & Plutarque en la vie de Lycurgus, duquel recommandant l'usage entre les vêtements des soldats de Lacédémone, ils dient qu'il estoit fait de sorte, que la couleur engardoit de connaître les eaux: que l'on est contraint de boire en un camp, si ordes qu'elles font mal au cœur à les voir seulement. Ainsi le Pere Coton, ou plutôt toute la Kyrielle des Iesuites, par son faux semblant & sa contenance hypocrite, a toujours caché à notre bon Roy la ruse & le trouble de leur cabale, le venin & le scorpion qu'ils receloient sous leurs capotes, quoy que leur habit espagnol, leurs institutions catholiques, n'osassent dire Chrestienne, comme S. Augustin la nommoit, & leurs equiuocques les descouurerent assez: entre autres celle du mesme Coton, qui dict en son Epistre declinatoire, Les rois en France estre les fils aînez en l'Eglise, n'osant dire le Roy de France en general, de crainte d'offenser ce grand Milan son bon maistre qui pretend iniustement ce titre.

Il ne faut pareillement trouver estrange si l'on s'est estudié de trouver ceste misterieuse sentence en l'Anagramme de pierre Coton parlant à tous les Iesuites:

Ton nom ce dict de par Pluton,

PERCE TON ROY, PIERRE COTON.

Handwritten title: "The History of the Jews"

THE COLLEGE OF THE HOLY TRINITY